

咸寧長安兩縣續志

咸寧長安兩縣續志卷十五

列傳

漢唐之世兩邑人才之盛甲天下宋元以還漸不復振然而有清一代前之梁張後之薛趙武功文治震褭當時謂不古若豈篤論歟茲篇周幹秦良張鉤何簡或爲令僕或爲郎官詩美榛苓書詢黃髮此其選矣嗚呼孝章猶存蘇子嗟歎由今視昔人亦勉爲不朽焉耳盛衰消長之說固不足爲人才限制也其他一行一藝依前志別爲傳此不具書書其最著者作列傳

咸寧

馬驥乾隆五十五年武進士雲南廣西營守備隨征貴州興義諸苗累著戰功賜花翎遷永昌都司嘉慶二年川陝楚教匪日熾調驥赴川協剿賊首王三槐等屯聚東鄉各要隘驥裹創力戰迭克賊壘後

賊竄楚境追及之連戰皆捷又擊敗青白藍各號殘匪及黃號賊首
樊人傑擒僞先鋒時賊勢窮蹙議撤各省兵歸伍驥請留軍中靖餘
匪尋調湖北宜昌都司軍政卓異累遷山西汾州參將李文成陷滑
縣以澤潞界連豫境檄驥出山防堵道光元年陞廣東南雄副將未
赴任擢貴州安義總兵丁母憂服闋授廣東高州總兵後以年老休
致賞食全俸二十年卒

文獻徵集錄
耆獻類徵

許紹宗字迪光一字蓮舫其先浙江山陰人父燦客關中遂籍咸寧
紹宗由嘉慶戊午舉人辛酉成進士改庶吉士散館授湖南永定知
縣歷任慈利巴陵武陵等縣武岡知州鳳凰廳同知蒞官二十餘年
治公事如家事興利除害勸農桑興學校育嬰水利諸事皆講求措
施如不及每聽訟不輕定讞不輕予杖而民自折服湖以南風氣刁
健越訴京控者比比惟紹宗所蒞獨無作居官六箴曰忍斷勤慎靜

恆而不言清謂自好者皆能之無足異也初任永定時縣民王嗣南以邪教輾轉傳八十餘人紹宗偵知之率健卒夜抵嗣南所繫之得其經卷及悖逆書究出黨首七人窮一夜捕獲之論如法而貰其餘令自新又嘗溝漩水入淩漑田數千頃民皆德之攝慈利時懲害民之積匪獲發塚之真盜人服其神明嘗修武陵武岡各志嚴簡有法著有讀雪齋學詩學文經藝及讀史隨筆史評補又以關學一脈自涇野迄孫酉峯後危如一綫思振興而不著之乃未中壽而歿櫬歸過武陵民人悲戀留葬於城西子孫因占籍焉

續通志稿

八十六那拉氏滿洲鑲白旗人西安駐防

駐防城在咸寧縣境

由馬甲隨征金

川及薩拉爾回匪有戰功陞防禦嘉慶初教匪倡亂八十六隨西安將軍轉戰湖北四川及興安漢中等處迭克城寨擒斬無算屢殲賊目獲首逆曾士興高名貴張漢潮等擢佐領三省肅清凱撤回旗陞

協領十六年授青州副都統効驍騎校齊車佈因姦釀命治如律奏
明於正兵外挑閒散壯丁作爲餘兵一體訓練遷綏遠城將軍請於
界連大青山之蒙古設卡倫資巡緝又嚴定台吉佐領等承緝處分
並西勒呼圖克圖所屬僧俗窩留賊犯及商民被刼分別責懲各章
程尋調廣州又調江寧召來京道光元年署正藍旗漢軍都統旋因
年老休致賞給全俸十四年卒賜祭葬諡壯僖子扎隆阿廕生官驍

騎校哲勒京阿文舉人

耆獻
類徵

李寶善字瑞臣道光甲午舉人大挑一等知縣改教職授澄城教諭
時楚豫不靖省城創立民團大吏檄寶善理其事有疑懼者曉以大
義乃樂從又陳時事十餘條悉中肯綮事已赴澄城任澄俗善訟有
同族諸生某某以事互控寶善曉以大義兩生感而泣願受罰時文
廟禮器缺旁有官吏憩室亦久圯寶善從其請使兩生各自營治之

不假吏胥之手自是無骨肉赴訴者士習一變同治壬戌回亂城小
而頽勢不能守有勸之暫避者寶善曰我行士民安往乃單騎詣縣
南交道鎮招集團丁爲防守計城賴以全將軍多隆阿入關討回檄
寶善催運糧餉士飽而民弗苦以勞奏獎光祿寺署正銜尋因病乞
休已解任矣邑紳攀留主講席踰歲歸里其爲人愛戴如此晚年學
益精邃主講崇化宏道各書院多所造就寶善事母孝師事其兄丹
巖照堂撫姪一如其子子象惺姪象忬補行壬戌甲子科同榜舉人
均官教職有盛德及門多知名之士象惺子紹武諸生次子恭壽山
西巡檢象忬子嵩壽廩生歷署四川鹽源縣丞甯遠府普格經歷亦

以廉勤著

續通志稿
並採訪冊

楊駒更名隲字定夫一字季駿竹泉其號也生有至性母有疾則涕
泣不食幼承庭訓博極羣書年十四入邑庠爲名諸生道光甲午舉

於鄉羣以老師宿儒相推許從游者衆嘗主鄠縣書院講席官三水縣教諭訓迪有方士論翕服官三水日回亂作援軍不至城守戒嚴駒與縣令某登陴固守凡兩月餘昕夕不懈卒保危城逮事平而身况瘁遂不起士民哀之生平於詩古文詞有心得整屋路德主講關中極激賞之工書法精篆隸刻有陰騭文印譜一卷

陳曾望字磻溪道光十七年舉人大挑知縣分發甘肅歷任寧遠徽縣清水高台等縣代理秦州直隸州刑清政簡所至有聲卒於高台縣任子璠字魯珍同知銜甘肅候補知縣歷署崇信寧州等州縣事翁健字立夫一字雪樵道光己酉舉人援例爲甘肅知縣尋以勞績奏加運同銜署渭源縣事渭源地居偏僻流犯驕縱幾不可制百姓畏之如虎無所告愬健下車廉得其情擒渠魁立置重典餘衆脅息民乃安居同治初權篆環縣時陝回已叛鄰近固原有響應者明年

固原城陷環境戒嚴隴東官路不通兵車往來皆取道縣境供億繁
難健自典衣物以濟其乏不悞軍亦不累民大吏稱善調權慶陽府
知府保境籌防事無不舉紳民愛戴久之乃致仕歸逾年土匪扈彰
等盤據北山凡數萬民苦其擾顧其中多環慶固原人激於義憤起
與賊角非甘心爲匪也或以其狀白大府且言健在任時得人心可
招撫之大府韙其議卽以健任招撫事衆果散歸拯拔難民極多皆
安插涇渭之間屯墾焉年六十卒於家

張祺字仲文道光己酉拔貢四川知縣咸豐四年調管西藏糧務時
廓爾喀方構釁當事檄襄夷務事平晉直牧補茂州歷署資眉能勤
厥職眉据大江上游同治九年三月江魚堤決口水下趨則民田將
盡湮祺乃率所部駛集隄所相度而躬率之工役數百日夜不息凡
十有三日堤成眉人至今不忘其惠祺於書無所不讀而天文數學

爲尤精凡中法之四元西法之借根代數等術無不綜貫自成一家
著有天元學演一書未成而卒

薛桂一字少鄰號月農咸豐辛亥舉於鄉丙辰成進士以知縣卽用
改工部主事甘肅候補知府署平涼府政去煩苛士民感誦屬邑有
盜案多株連桂一察其冤誣者宥之卒獲真盜丁父憂歸大吏邀襄
西征糧臺請亟儲粟以裕軍食得免譴漬奉檄赴晉籌餉集金數十
萬敘績以道員用加鹽運使銜二品封典以母老不復出年七十九
卒子秉壬字筱農光緒丙戌進士陸軍部員外郎猶子寶辰字壽萱
光緒己丑進士改庶吉士授編修官至翰林院侍講學士

李滋苑字芳洲號閬仙道光二十六年丙午科舉人咸豐三年癸丑
大挑一等知縣分發山西署長子縣同治元年在封口防賊出力奏
加同知銜補授右玉縣在任六年凡民訟者以鳴鑼訴政通人和循

譽卓然士民愛戴同治十年以疾卒於永寧州任

張濟川字子輿咸豐六年舉人同治中歷任廣東和平河源等縣清廉無私政聲頗著在任數年民愛之如父母

吳培棠字耐沉初爲漢軍旗籍始祖天祿爲齊齊哈爾副都統清初入京至協領應登始駐防於西安乾隆末漢軍撤防遂爲咸寧人世官弗替培棠卽孝子嘉梅之孫也由增生獎敘府經歷分四川咸豐十一年補潼川府經歷以軍功陞知縣尋克復西陽秀山等城保直隸州知州用加運同銜賞花翎同治四年補授太平縣歷署江津岳池鹽亭安岳什邡等縣事均有惠政任太平時藍黨初靖灰燼之餘百廢俱舉事行而民不擾解組後邑人懷德爲位而尸祝之至今歲時猶附祀劉猛將軍廟香火不絕

翁其森字練亭邑庠生健猶子善騎射精技擊慷慨有大志時事方

棘屢困秋闈遂博考兵法思以辦賊自任同治初回亂作健爲環縣令其森隨侍倡辦團練逐賊出境轉戰鎮原等處以功保訓導加藍翎五品銜擒匪竄陝其森防守東關賊不得逞又與長安柏景偉總辦西同鳳三府堅壁清野相得甚歡繼又隨健招安北山土匪扈彰等數萬人咸就撫拔出難民安插涇渭間委辦屯墾全活甚衆援例捐陞同知加知府銜未仕卒景偉深惜之及葬銘其墓

徐銘勳字子樹原籍江蘇由副貢中同治庚午舉人光緒丁丑進士改翰林院庶吉士散館授直隸高陽知縣抵任捐修文昌樓復濬河修隄先勞無倦頌聲大作歷權正定滄州清苑等州縣陞署定州直隸州知州正定滹沱河水泛溢輿徒病涉往往陷溺銘勳創製官船嚴禁需索以利行旅清苑爲省會首邑政務殷繁調任五載案無留牘會數月不雨民心惶恐乃步行入山虔禱立沛甘霖滄定二州向

多盜匪銘勲寬嚴並濟化莠爲良有賣刀買牛之績又捐廉修復定

武書院躬親課試士風丕振卒於官

以上俱採訪冊

宋之章字少谷其先雲南昆明人父來賓字寅谷以道光庚戌進士官甘肅玉門知縣權階州直隸州知州有膽識多惠政事具階州志初因避亂寓咸寧遂家焉之章性孝友能文工書究心經世之學由監生敘通判發甘肅以勞績保升知州歷署鎮原平番徽縣古浪知縣寧州知州貴德同知固原直隸州知州補狄道州尋保在任候補知府所至以休養爲政興學校籌賑撫安民察奸以廉能著總督陶模慮河湟撫回饑變檄之章開辦西寧大通金廠以工代賑之章不避艱險回衆數千相率就食久而相安地方賴之貴德悍番叛據鐵瓦寺之章蒞任督兵驟進礮中酋首餘駭遁多加尕布兩族猶以雪山負嵎之章深入撫諭卒帖服固原漢回雜處號難治在籍某大員

初解兵柄不自安而提督某持之急海城回酋亦蠢然欲動謠詠紛紜居民驚徙之章密防靜鎮積誠意以感之卒弭巨禍論者謂與安回撫番皆大有造於甘民云性廉儉好施與任寧州時亂後田賦粗定官吏習中飽弗舉實之章慮訐發興大獄僅作新墾升科餘不問坐是瘖苦虧巨帑質物稱貸以償之數典劇要始終堅苦官愈久貧亦愈甚日手一編泊如也年五十有六卒於任著有新疆善後議甘肅輿地考全隴財政條議兄之京字心符績學有文名工隸楷習繪事同治庚午舉人辛未聯捷成進士官戶部浙江司主事主講豐登書院旋卒子聯奎字聚五光緒己丑舉人歷任四川忠州資州直隸州知州敘州寧遠及雲南楚雄永昌等府知府迤西兵備道騰越關

監督

按康對山韓五泉武功朝邑等志例得列其先君之行不以爲

嫌茲以續通志稿原傳附入古人所謂誣親以善與知而弗傳之譏庶幾免矣聯奎謹識

雷豐字恆山同治庚午科帶補丁卯科舉人以修堡寨功保教職歸部候選補授吳堡縣教諭嚴於課士杜絕苞苴生監好訟則切戒之有勸士詩六首語婉而諷久之士風丕變歸長少墟書院逾年辭歸家固不裕賓至留飲歡暢竟日座客常滿有北海之風云

雷振林字樾村豐之胞姪同治癸酉拔貢本科舉人嚴峻拔俗初肄業關中書院爲高才生糧道某公知其名欲羅致門下示意同舍令其一謁羣慫慂之卒不往月課以膏火自給不求仕進曾一主鄜州經正書院及其門者多聞於時書宗歐陽率更文師昌黎均能得其神似而不輕著述稿成輒棄之僅有詩文若干篇存於家

蘇湘字曉帆魁梧豪爽倜儻不羈工詩畫得者恆珍藏之當秀才時

卽慨然以天下爲己任不斤斤於詞章之末後與柏澧西劉古愚李敬恆袁寶初諸先生游盡棄舉業日以經世之學相切磨花門之變澧西奉檄辦鄉團修築堡寨湘爲之助相得益彰旣而澧西應左文襄公聘參贊戎幕湘亦在營多所建白事定奏獎銜翎比歸里則兵燹之後家室蕩然無已則以筆耕走四方居麻城縣幕凡八載居停倚之如右手積勞致疾卒於鄂生平著作散佚殆盡今僅有致澧西一書猶膾炙人口

王兆慶字子雲號匿巖同治壬申歲貢生性狷介一毫不苟文章豪邁屢試薦而不售晚年詩酒自娛書法尤工筆力蒼秀同治三年佐柏澧西先生辦賑勞勩不辭光緒十八年司鐸澄城教士懇切儒林歌頌公餘臨池染翰揮灑自如居澄三載踵門求書者卷帙山積解組之日士紳僚友皆以詩歌贈其行極一時之盛錢云

楊彝珍字秉初附貢生同治壬戌軍興佐檢討吉長清辦城防巡撫
劉典奏保訓導旋奉檄拓築郭牆並東路一帶墩台事竣敍勞以知
縣用並賞藍翎五品銜又獎給保障功偉匾額多忠勇公之入關勦
賊也追議張文毅公遇難事立擒回紳馬百齡幾以軍法徇彝珍率
衆紳援救得免一時士庶咸推重之壬申選授同州府學訓導兼辦
府治團防屢獲巨匪克消隱患學使許振禕偉其才每以未膺民社
惜之光緒庚辰升華州學正教士專以治事爲重未幾因疾引退彝
珍性豪爽慷慨好義於公益事無不勇助其成尤喜排難解紛地方
賴以息爭者不可枚舉光緒甲午河湟告警陝中大吏飭修城郭里
人懷其前績爲勒石郭外稱頌焉

王之傑字漢三光緒甲午進士以主事分刑部潛心讀律爲尙書薛
允升器重恆以法家許之二十八年秋審民婦何氏聽從伊女姚氏

謀斃壻妾一案母女俱擬絞而以嫡庶名分女改緩決之傑覆勘以謂嫡庶之分固嚴母女之倫尤重詳覈案情當該氏哀求幫助伊母勸解不聽反以尋死挾制是何之允從迫於溺愛姚之潑悍卽此可知查例載尊長謀殺卑幼如與死者之子同謀致其子罪干凌遲起意之犯絞決尊長陷卑幼之子於極刑尙不能照尋常謀殺卑幼定擬出嫁之女陷其母於縲首似應較尋常謀殺夫妾略嚴又例載婦女與人通姦致母羞忿自盡無論出嫁在室俱擬絞決犯姦之婦女致母自盡尙難稍事姑容謀命之婦女致母絞抵何得率爾入緩云云長吏激賞卽據以定讞其勘詞傳誦一時論者謂其批卻導窺引伸經義以爲律意漢廷老吏當不過此之傑治獄明決此其一斑要其大凡可知也之傑爲文言不苟造恆苦思得之駢文尤工卒年四十有四

以上俱
採訪冊